



## **OPĆINSKI NAČELNIK**

Broj:01-1-02-1-1735/16

Vitez: 06.05.2016.godina

Na osnovu člana 15. Zakona o principima lokalne samouprave u Federaciji Bosne i Hercegovine («Službene novine FBiH» broj 49/06 i 51/09), člana 18. Odluke o izvršenju budžeta općine Vitez za 2016.godinu ("Službeni glasnik općine Vitez" broj 10/15) i člana 38. Statuta općine Vitez („Službeni glasnik općine Vitez" broj 5/08), Općinski načelnik donosi

### **PRAVILNIK o kriterijima za dodjelu jednokratnih novčanih pomoći**

#### **I OPĆE ODREDBE**

#### **Član 1.**

Ovim pravilnikom utvrđuju se uslovi, kriteriji, način i iznos sredstava za dodjelu jednokratnih novčanih pomoći licima i domaćinstvima u teškoj materijalnoj situaciji sa područja Općine Vitez.

#### **Član 2.**

Sredstva za dodjelu jednokratnih pomoći planiraju se u budžetu Općine Vitez za svaku kalendarsku godinu.

#### **Član 3.**

Sredstva predviđena za jednokratnu pomoć isplaćivat će se za slijedeće namjene:

- Pomoć u liječenju oboljelih lica
- Pomoć u nabavci ortopedskih pomagala
- Pomoć za nabavku školskog pribora pod uslovom da isto pravo nisu ostvarili po drugom osnovu
- Pomoć nezaposlenima i osobama bez ikakvih primanja
- Pomoć nezaposlenim porodiljama koje ispunjavaju uslove i kriterije iz člana 4. i 5.
- Licima koje se nalaze na izdržavanju zatvorske kazne

- Pomoć se može dodijeliti i u posebnim slučajevima kada je osoba došla u tešku materijalnu situaciju izazvanu posebnim okolnostima (viša sila, elementarna nepogoda, iznenadna smrt i dr.).

## II USLOVI I KRITERIJI

### Član 4.

Licom odnosno domaćinstvom u teškoj materijalnoj situaciji u smislu ovog pravilnika smatraju se:

-lica odnosno domaćinstva čiji prihod za jednog člana domaćinstva ne prelazi iznos od 150,00 KM.

Jednočlano i dvočlano domaćinstvo čiji prihod ne prelazi iznos minimalno isplaćene penzije u FBiH.

U iznimnim slučajevima pomoć se može dodijeliti i licima koje ne ispunjavaju odredbe čl.4. i čl.6. ukoliko načelnik ili stručno vijeće centra ocijeni da je neophodno, uz obaveznu pismenu zabilješku i obrazloženje.

### Član 5.

Ukupan prihod domaćinstva kao osnov za utvrđivanje prava po ovom pravilniku, čine prihodi koje članovi domaćinstva ostvaruju po osnovu:

- plaća i drugih primanja iz radnog odnosa
- starosne, invalidske i druge penzije
- primanja iz BIS/BIZ
- prihodi po osnovu imovinskih prava
- prihodi po osnovu privrednih, uslužnih i drugih djelatnosti.

### Član 6.

Pravo na jednokratnu novčanu pomoć u smislu ovog pravilnika **ne mogu ostvariti** slijedeće osobe/lica:

- lica i domaćinstva koja stambene jedinice izdaju u zakup
- domaćinstva čiji je član vlasnik preduzeća, samostalne radnje ili ima registrovanu dopunsku djelatnost
- domaćinstva u kojima je jedan od članova vlasnik registrovanog privatnog putničkog ili motornog vozila osim ako to vozilo služi kao ortopedsko pomagalo.

## **Član 7.**

Članovima porodičnog domaćinstva u smislu ove odluke smatraju se podnosilac zahtjeva i članovi njegovog domaćinstva koji žive s njim.

### III NAČIN OSTVARIVANJA POMOĆI I IZNOS DODIJELJENIH SREDSTAVA

## **Član 8.**

Zahtjevi će se podnositi Centru za socijalni rad Vitez koji će putem stručnog vijeća centra rješavati pojedinačne zahtjeve i donositi odluke po istima.

Općinski načelnik će imenovati jednog člana ispred općinskog organa uprave koji će zajedno sa stručnim vijećem centra rješavati zahtjeve za jednokratnu pomoć.

Stručno vijeće centra će razmatrati zahtjeve po potrebi, a najmanje dva puta mjesečno.

## **Član 9.**

Visina jednokratne novčane pomoći po ovom pravilniku ne može biti manja od 50,00KM, a niti veća od 200,00KM.

Visinu i učestalost pomoći će predlagati stručno vijeće centra u zavisnosti od materijalnih prilika i situacije u svakom konkretnom slučaju.

Pomoć se može ovisno od potrebe i procjene dodijeliti više puta u godini s tim da ukupna godišnja visina pomoći po domaćinstvu ne može biti viša od 400,00 KM.

Najmanji vremenski razmak između prethodnog i narednog podnošenja zahtjeva od strane iste osobe/lica (domaćinstva) je tri mjeseca.

## **Član 10.**

U iznimnim slučajevima kada načelnik ili stručno vijeće centra ocijeni da je neophodno, može se dodijeliti i veći iznos od visine utvrđene članom 9., a uz obaveznu pismenu zabilješku i obrazloženje.

## **Član 11.**

Uz zahtjev za jednokratnu pomoć stranka je dužna stručnom vijeću centra dostaviti dokaze o ispunjavanju uslova i kriterija iz člana 5. i 6. ovoga Pravilnika.

## **Član 12.**

O realizaciji sredstava po kriterijima iz ovog Pravilnika stručno vijeće centra je dužno voditi statistiku dodijeljenih pomoći kroz tabelarni pregled čiji će formu usaglasiti Služba za društvene djelatnosti i predstavnici Centra za socijalni rad.

Istu će, na kraju svakog mjeseca, po završetku raspodjele mjesečno doznačenih sredstava, dostaviti općinskom načelniku na uvid.

Općinski načelnik će godišnje izvijestiti Općinsko vijeće o realizaciji budžetskih sredstava za jednokratne pomoći.

## **Član 13.**

Raspodjela sredstava po ovom Pravilniku vršit će se shodno raspoloživim budžetskim sredstvima.

## **Član 14.**

Ovaj Pravilnik stupa na snagu danom donošenja.

***OPĆINSKI NAČELNIK***

***Advan Akeljić***